


Die Corpora rüren in einer hohlen kugel mit all iren ecken an / wie ich hie for die selben kugel auch aufgerissen hab / vnd diese corpora magst du von einer größ zwifach durch einander reysen / also dz alweg das ein eck durch des anderen planum sticht / das sticht im werck gar erdig. Du magst auch auf diese körper auf einen ynden plano einen spizen punct setzen / nider oder hoch erhaben so von vill ecken als der planus hat darauff er stet. Solichs magst du auch gebrauchen mit den vngeregulirten corporen / wo sie in einer spera vberall anrüren.

Ein yedlich corpus das mit geraden ebnen beschloffen wirt das muß eck vnd scharpffseiten haben. Das heyst ein scharpfe seiten / da zwo ebnen zusammen stossen / sie sein im winckel weyt oder eng. Ein yedlich ganz kuglet ding hat kein eck / es sey ablang oder rund.

Auch sind noch vill hübscher corpora zu machen / die auch in einer hohlen kugel mit all iren ecken anrüren / aber sie haben vngleyche felder / der selben will ich eins teyls hernach aufreysen / vnd ganz aufgethan / auf das sie ein yedlicher selbst zamen müß legen / welcher sie aber machen will der reys sie größer auf ein zwifach gepapert papier / vnd schneyd mit einem scharpffen messer auf der einen seiten all reys durch den einen pogen papiers / vnd so daß all ding auß dem vberigen papier geleidet wirt / als dann legt man das corpus zu samen so lest es sich geren yn den ryssen piegen / darumb nym des nachfolgeten aufreysens acht / daß soliche ding sind zu vill sachen nüt.

Das erst Corpus das nit ganz mit seinen plan gleich an einander ist / das hat vier sechs ecketer vñ drey driangleter ebner felder / aber die scharpffen seiten sind all gleich lang aneinander / vñ so dis Corpus als es offen ist zamen geschlossen wirt / so gewint es zwölff eck vñ achtzehn scharpffer seiten.



Das ander vngereguliert Corpus / hat sechs achtecketer / vnd acht triangliche felder / so man dis Corpus als es offen auffgerissen ist zusammen leget / gewint es vier vnd zweynzig eck / vñ sechs vnd dreissig scharpffer seiten.

